



N°1948  
Entrée le 14.02.2025  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 17.02.2025  
Chambre des Députés

Groupe parlementaire

Här Claude Wiseler

President vun der Deputéiertechamber

19, um Krautmaart

L-1728 Lëtzebuerg

Tratten, de 14. Februar 2025

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Schoulminister, un den Här Sportsminister an un den Här Banneminister weiderzeleeden.

Den 13. Februar gouf an der Chamber iwwert d'Promouvéiere vu sportlechen Aktivitéite fir Kanner a Jugendlecher am ausserschoulesche Beräich debattéiert. Am Kader vun dëser Debatt huet den Här Educationminister dofir plädéiert, datt ee Sportsinfrastrukturen, déi queesch duerch d'Land stinn, an déi dem Staat gehéieren, sou gutt wéi méiglech auslaaschte soll. Weider huet et geheescht, datt een awer och, wat d'Infrastrukturen an d'Zesummespill mat de Gemengen ugeet, dacks u Limitte géif stoussen.

D'Schoule sollten deemno och selwer kucken, fir peri- a parasportlech Aktivitéiten unzebidden. Vu datt d'Plus-value vu sportlechen Aktivitéiten an der Bewegung allgemeng jidderengem kloer sinn, sinn dës Iwwerleeunge vu Säite vun der Regierung natierlech begréissenswäert.


An der Praxis an och wat d'Realitéit um Terrain ugeet, gesäit d'Situatioun allerdéngs dacks anescht aus. Esou ass z.B. de Clierfer Lycée mat enger ganz moderner Schwämm ekipéiert, allerdéngs ass et de Kanner a Jugendlechen net méiglech, ausserhalb vun de Lycéeszäiten do Sport ze maachen. D'Schwämm am Clierfer Lycée ass deemno am ausserschoulesche Beräich just vereenzelt fir Sportsclubb disponibel. Op anere Plazen am Land gesäit een awer, datt Konventiounen tëscht de Gemengen an der jeeweileger Schoul existéieren, déi eng méi breet gefächert Zougängelechkeet vun der jeeweileger Sportsinfrastruktur - z.B. enger Schwämm - erméiglechen.

Am Fall vu Clierf- a konform zu der Iwwerzeegung vun der Regierung, staatlech Gebailechkeeten, déi fir sportlech Aktivitéite genotzt kënne ginn, méi auszelaaschten - wär et sécherlech vu Virdeel, datt d'Schwämm am Lycée och ausserhalb vun de Schoulstonne fir Privatleit a Jonker méi disponibel wär, allerdéngs feelt et - vu Säite vum Lycée - um néidege Personal, fir dëst kënnen ze assuréieren. Et ass dobäi wichteg ze betounen, datt hei d'Initiativ, fir personaltechnesch opzerëschten - z.B. iwwert de Wee vun enger zousätzlecher Astellung vun engem Concierge a Schwammmeeschter - vum Lycée selwer misst kommen an net zu Laaschte vun der Gemeng däerf goen, well et jo a priori net un der Gemeng ass, déi mat enger staatlecher Sportsinfrastruktur verbonnen Aufgaben ze assuréieren.

An deem Kontext hätt ech follgend Fro un d'Regierung:

- Wär d'Regierung bereet, déi bestoend Infrastruktur vun der Clierfer Lycéesschwämm méi auszelaaschten, z.B. duerch eng personaltechnesch Oprëschtung, esou datt - wéi d'Regierung dat wënscht - méi Jonker an och aner Privatpersounen sech och am ausserschoulesche Beräich sportlech betätege kënnen?

Mat déiwem Respekt,



Jeff Engelen  
Deputéierten



**Gemeinsam Äntwert vum Minister fir Educatioun, Kanner a Jugend, Claude Meisch, an dem Sportsminister, Georges Mischo, op d'parlamentaresch Fro Nr. 1948 vum honorabelen Deputéierte Jeff Engelen**

D'Regierung bekräftegt op dësem Wee nach eng Kéier hire Wëllen, souwuel déi staatlech Sportsinfrastrukturen besser auszelaaschten, ewéi och déi sportlech Aktivitéiten am ausserschoulesche Beräich ze promovéieren.

Wat elo de Fall vum Clierfer Lycée (LESC) betrëfft, sou sinn do aktuell zwee Schwammmeeschteren agestallt.

Während de Schoulzäiten (08:00-16:30 Auer) ass d'Schwämm vum Lycée duerchgeeënd a voll besat, dëst duerch déi 58 Klasse vum nationalen an internationalen Enseignement secondaire an déi 18 Klassen vum internationalen Enseignement maternel a primaire; dobäi kommen d'Hallschecht vun de Klasse vum nationalen Enseignement fondamental grad ewéi eng Rei vu peri- a paraschouleschen Aktivitéiten.

Vu 16:30 bis 18:00 Auer gëtt d'Schwämm fir d'Aktivitéite vun der LASEP genotzt.

De LESC assuréiert also de Betrib vun der Schwämm vu 06:30/07:00 Auer (Waasseranalysen an technesche Start) bis 18:00 Auer; dobäi muss een eng net onbedeutend Zuel vun Netschwämmen berücksichtegen gradewéi d'Tatsaach, datt sech ëmmer e puer Klasse gläichzäiteg an der Schwämm ophalen. Déi zwee Schwammmeeschtere sinn domat ausgelaascht.

Fir Aktivitéiten, déi owes solle stattfannen, ass d'Conciergerie assuréiert, allerdéngs müssen d'Veräiner brevetéiert Personal matbréngen; dëst ass beim Triathlon de Fall, deen owes an der Schwämm trainéiert. Et ass aktuell net geplangt, ee weidere Schwammmeeschter anzustellen.

Lëtzebuerg, de 17. Mäerz 2025

De Minister fir Educatioun,  
Kanner a Jugend

(s.) Claude MEISCH